

佛敎名勝不窟

南湖福地

——記四明延慶講寺始末

毛始平

四明延慶講寺，爲天台講宗五山之第二山，號稱：「南湖福地」。寺座落在寧波舊城東南隅，初建於五代周廣順三年（公元九五三年）名報恩院，宋大中祥符年間改爲延慶。嘉定十三年（公元一二二〇年）燬，丞相史魯公重建，譽爲「南湖福地」。元至元二十六年（公元一二八九年）遭火，僧善良重建。泰定元年（公元一三二四年）又火，元統元年（公元一三三三年）僧本無重建，明永樂六年（公元一四〇八年）又經重修。清順治年間建大悲殿，康熙十一年（公元一六七二年）建鐘樓。延慶爲法智大師道場，法智乃天台智者大師十五世嫡孫，而智者尤爲我國大乘佛法之宗主。法智於宋至道元年（公元九九五年）入主報恩院。先是此院結構年深，頽毀日甚，思得能者從而興之。法智乘召而至，肇興法會，親製疏文，使十方響應，千里悅來。閱三寒暑竣工，殿宇巍峩，土木瑰麗，奐輪之感，異乎尋常。大中祥符年間

敕賜寺額曰延慶。法智大師圓寂後，法嗣廣智主持，繼以神智、明智、澄照、圓辯、月堂諸師，咸遵祖訓，不墜家聲，清末民初，延慶日就衰落，寺產多被侵吞，幾瀕於絕。迨公元一九三四年，靜安長老來寺主持，亦幻法師任監院，相與爲理，於是返田歸舍，除弊興廢，百務隨之維新。乃敦請太虛、芝峯諸師會講法華，根慧長老修建法華三昧懺，以繼法智大師懺講雙修之風，學者雲集，共沾化雨。之後，抗戰軍興，烽火連天，靜公出走，法侶星散，惟亦幻偕月西困守祖庭，旋請天台耆舊與慈法師來主延慶，以冀光大祖庭。抗戰勝利後，太虛大師於公元一九四六年末蒞甬，駐錫延慶。丁亥新正虛公開講「彌勒上生經」，修建「菩薩學處」，縑素輻輳，至不能容，情況極一時之盛。惜在十年動亂中，延慶在劫難逃，房屋均被佔用，願千載古刹早日恢復，法道中興，佛日重輝。